

Vestland fylkeskommune
Agnes Mowinckels gate 5

5008 BERGEN

Svar - Vinterstenging av fv. 613 Gaularfjellet

Syner til brev datert 28.08 der Vestland Fylkeskommune ber om uttale i høve vinterstenging av fv. 613 Gaularfjellet. Saka har vore oppe til drøfting i Kommunestyret 10. september og basert på innspel frå kommunestyret vert det sendt slik uttale som følgjer under.

Sogndal kommune er svært uroa over eit framlegg om seinare opning om våren og ei fast stenging om hausten av fv 613 over Gaularfjellet. Me ber difor instendig om at det gjeldande stengingsregimet ikkje vert endra til ugunst for brukarane av fjellovergangen, men at ein heller styrkar beredskapen gjennom betra mobildekning på strekninga.

Vegen over Gaularfjellet knyter saman administrasjonsstadane i nye Vestland fylke

Sogndal kommune meiner at Riksveg 13/FV613, mellom Sandnes og Sogndal/Førde i Vestland fylke, har fått auka betydning som fylgje av regionreforma. For reisande mellom Bergen, Sogndal og Sunnfjord er indre veg gjennom Vestland (Riksveg 13 og FV 613) eit naturleg val på deler eller heile strekninga mellom administrasjonsseta innan Vestland fylke.

Vegen over Gaularfjellet - Beredskapsveg ved stenging av E39/RV5/E16

Gaularfjellet representerer alternative rute ved lågare framkomme, og/eller stenging på stamvegnettet. Ut frå erfaring veit vi at E39, RV5 og E16 i periodar har stengingar, forlenga reisetid, ventetid grunna vegarbeid, naturhendingar, ulykker mv. Dette aukar også bruk av Vikafjellet og Gaularfjellet mellom Hardanger, Voss, Sogn og Sunnfjord. Tunnellutbetringar langs E16 i Aurland har, og vil framover få periodar med nye planlagde stengingar. Derfor er store deler av RV 13 frå Sandnes til Sogndal/Førde nytta som erstatningsveg og representerer alternativ korridor mellom nord og sør. Vi opplever dessutan ofte kritisk vegstenging til helsetilboda i vår region ved vegstengingar. Dette omsynet gjer at vi ikkje må innskrenke alternative vegruter. Perioden Gaularfjellet er ope bør derfor heller utvidast.

Gaularfjellet som viktig strekning i nasjonal turistveg.

Gaularfjellet er ein del av Nasjonal turistveg. Nasjonal turistveg har 18 køyreturar gjennom spektakulære landskap. Frå nord til lengst sør på Vestlandet har norsk arkitektur og design brynt seg på å legge til rette for store naturopplevingar. Langs 2000 km veg er det etablert særprega rasteplassar og utsiktspunkt som inviterer til møter med norsk natur. Plassane representerer nyskapande arkitektur og kunst. Ei slik nasjonal satsing, som Nasjonal Turistveg, må ikkje bli forringa av vesentleg forlenga vinterstenging.

Gaularfjellet sine kultur og naturopplevingar

Vegen bind saman viktige opplevingar i kunst og kultur gjennom at den knyter saman viktige museum som Kunstmuset i Sunnfjord med Reiselivsmuset i Balestrand. Balestrand er kjend for sin særprega tettstad med verneverdig bygningar og hotell. Langs vegen finn ein 29

større og spektakulære fossefall, rasteplassen Utsikten i Skaret, Vatnpumpa Mirage (ein av 10 i verda), stålbrua over Likholefossen, Hestad kapell og den 21 km. flotte opparbeidde Fossestien blant dei noverande viktigaste turistattraksjonane. Det har vore ein markant auke i reisande til Gaularfjellet etter at Utsikten opna i 2016. Det er nettopp i mai desse opplevingane gjev sterkast uttrykk. Ei utsett opning representere tapt marknadsvardi for næringslivet og manglande høve til friluftsliv. Det er stor utfart til skiområda ved brøytetasjonen ved toppen av fjellet når det vert brøytta. Vegen bør difor heller brøytast tidlegare enn 2. mai.

Gaularfjellet – tidleg opning som premiss for utviding av turistsesongen

Mange av desse flotte og særprega turistattraksjonane er i område kor fv613 er stengd om vinteren og publikum har difor vanskar med å besøke desse områda. Ei utsetting vil få store negative konsekvensar både for næring og publikum i ei tid kor næringa jobbar med å få til å utvide turistsesongen slik at drifta vert meir berekraftig. Å ta vekk inntektsgrunnlaget i heile mai månad, som er ein av dei beste besøksmånadene, kan for bedrifter bety kroken på døra i eit fylke kor ein verkeleg satsar på reiseliv som gir viktig sysselsetting i distrikta. Vi opplever også framlegget som konkurransevridane i høve andre deler av fylke.

Sogndal kommune ber om at framlegg om sein opning av Gaularfjellet vert lagt bort

Slik vi kjenner Vestlandsklimaet er det store variasjonar i snømengda frå år til år. Det er urimeleg å nytte ekstremvinteren 2020 som mal. Vi krev at Vestland fylkeskommune legg vekk planen om opning av fjellet 1. juni, og heller rettar fokus på betra mobildekning for å sikre beredskapen langs vegen. Vi minner om at det heller ikkje er mange år tilbake i tid at vegen var heilårsopen.

Med helsing
Sogndal kommune

Arnstein Menes
ordførar

Brevet er elektronisk godkjent og er utan underskrift.

Kopi til:

Vedlegg: